



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

"CABARAN PENDIDIKAN MASA KINI; APAKAH PERANAN MASJID?"

19 Februari 2021 / 7 Rejab 1442

الْحَمْدُ لِلَّهِ¹ الْقَائِل:

أَقْرَأُ بِاسْمِ رَبِّكَ الَّذِي خَلَقَ^١ خَلَقَ الْإِنْسَانَ مِنْ عَلَقٍ^٢ أَلَمْ يَكُنْ مِنْ سَلَمَاتٍ^٣ أَفَرَأَى^٤ إِنْ كُنَّ حَتَّىٰ تَعْلَمَ^٥ بِالْقَلَمِ^٤ عَلَّمَ الْإِنْسَانَ مَا لَمْ يَعْلَمَ

(Surah Al-Alaq ayat 1 hingga 5)²

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ³ وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁴ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Saya berpesan kepada diri saya dan sidang Jumaat sekalian, marilah kita sama-sama tingkatkan ketakwaan kepada Allah SWT, dengan mentaati segala perintah-Nya dan menjauhi segala larangan-Nya. Mudah-mudahan kita tergolong sebagai hamba Allah yang diredoi, beroleh kejayaan di dunia dan di akhirat. Mimbar pada hari ini akan membicarakan khutbah yang bertajuk "Cabaran Pendidikan Masa Kini; Apakah Peranan Masjid?"

Sidang Jumaat yang dirahmati Allah,

Ketika negara mencapai kemerdekaan 64 tahun lalu, cabaran pendidikan berkait jurang antara bandar dan luar bandar. Kemudahan pelajaran dan pendidikan antara anak-anak yang menetap di bandar dengan anak-anak yang tinggal di luar bandar sangat ketara perbezaannya. Masyarakat di luar bandar, majoritinya tidak memiliki bekalan elektrik, air bersih dan jalan raya. Sekolah-sekolah di luar bandar pula memiliki kemudahan yang terlalu asas dan bilangan guru yang kecil. Anak-anak di luar bandar, pada waktu malam perlu menggunakan lilin dan pelita minyak untuk menyiapkan kerja sekolah, membaca atau menelaah.

¹ Memuji Allah

² Ayat Al-Quran

³ Selawat ke atas Nabi Muhammad SAW

⁴ Pesan Taqwa



Menyedari pendidikan berperanan utama dalam usaha mengubah nasib seseorang insan, kerajaan telah memberikan tumpuan untuk membangunkan program pendidikan negara berskala besar. Setiap tahun peruntukan kewangan untuk program pendidikan diberikan keutamaan, berbanding untuk membeli senjata atau alat peperangan. Melalui peruntukan kewangan yang besar, kerajaan telah membina lebih banyak sekolah berasrama untuk membolehkan anak-anak desa berpeluang belajar di bandar, di samping membina sekolah dengan bilangan yang banyak di kawasan-kawasan luar bandar. Kawasan luar bandar turut dilengkapi dengan bekalan elektrik, saluran air bersih dan jalan desa, agar jurang antara bandar dan luar bandar dapat dirapatkan.

Hasil daripada program pendidikan yang bersungguh itu, anak-anak dari kawasan luar bandar berjaya dikeluarkan daripada tempurung kehidupan tradisi mereka. Melalui program pendidikan, anak-anak dari kawasan luar bandar membuktikan kecerdasan minda jika disediakan kemudahan yang sama dan diberikan peluang yang saksama; terbukti apabila mereka berjaya menguasai bidang-bidang profesional seperti perubatan, perakaunan, perbankan, perdagangan, jurutera, jurubina, juruterbang, undang-undang dan pelbagai lagi; mereka merupakan sebahagian besar daripada golongan menengah dan menengah atas dalam negara pada hari ini.

Sidang Jumaat yang dirahmati Allah,

Setelah 64 tahun mencapai kemerdekaan, dunia, negara dan warga hari ini dilanda cabaran baharu. Sudah lebih satu tahun dunia berhadapan dengan pandemik Covid-19, yang telah memberikan impak besar terhadap kehidupan manusia.

Covid-19 bukan sahaja menjadi cabaran besar kepada dunia kesihatan tetapi telah menjejaskan kehidupan alam dan kehidupan insan dalam pelbagai bidang. Dunia pendidikan telah terjejas secara langsung. Sekolah kini terpaksa ditutup untuk mematuhi langkah-langkah pencegahan kesihatan. Anak-anak yang sepatutnya berada di bangku sekolah, kini terpaksa tinggal di rumah, terhindar daripada peluang untuk mendapatkan bimbingan guru di dalam bilik darjah secara bersemuka.

Hampir 1.6 bilion pelajar di seluruh dunia menerima kesan; tanpa diperkenalkan langkah inovatif, dianggarkan 23.8 juta orang kanak-kanak di seluruh dunia akan tercicir daripada sistem persekolahan. Jurang ilmu dikhuatiri akan bertambah luas akibat daripada pandemik Covid-19.



Untuk menangani cabaran yang sedang dihadapi, dan untuk membolehkan anak-anak tidak tercicir mengikuti pelajaran, Kementerian Pendidikan Malaysia telah memperkenalkan kaedah Pengajaran dan Pembelajaran di rumah atau dirujuk dengan singkatan nama PdPR iaitu pengajaran dan pembelajaran (PdP) yang dilaksanakan di rumah atau pusat komuniti atau di mana-mana lokasi yang bersesuaian. PdPR boleh dilaksanakan dalam talian atau luar talian. PdPR dilaksanakan apabila murid tidak dapat hadir ke sekolah dalam satu tempoh yang tertentu atas sebab bencana atau wabak atau sebab-sebab lain dengan kelulusan pendaftar negeri.

Kaedah PdPR ini melibatkan hampir lima juta orang pelajar dan lima ratus ribu orang guru. Di negeri Perak sendiri terdapat seramai 367, 662 orang pelajar dan 28, 096 orang guru yang melibatkan 1,102 buah sekolah rendah dan menengah. Kaedah Pengajaran dan Pembelajaran di Rumah, memerlukan kesempurnaan digital, akses internet dan pemilikan peranti. Ibu bapa juga harus menjadi mata dan tangan guru buat sementara waktu, sehingga sekolah dibuka semula nanti. Hanya dengan cara ini kita semua boleh bekerjasama untuk mengelakkan ketinggalan dalam kalangan anak-anak kita dengan menyediakan mereka untuk bersedia meneruskan pembelajaran.

Di Malaysia, kumpulan yang paling terkesan ialah anak-anak yang datang daripada keluarga berpendapatan rendah. Anak-anak yang berlatar belakang keluarga yang daif status ekonominya dan ibu bapa yang buta pengetahuan digital, amat perlu diberikan perhatian dan dibantu agar berupaya mengikuti pelajaran secara maya. Berdasarkan data tahun 2020, dilaporkan seramai 39 peratus pelajar di seluruh negara tidak mempunyai sebarang peranti elektronik. Daripada 367, 662 orang pelajar di negeri Perak, 8.91 peratus murid tiada memiliki peranti, 11.73 peratus murid tidak mempunyai data internet dan 15.57 peratus murid di kawasan kediaman mereka tiada liputan internet.

Sidang Jumaat yang dirahmati Allah,

Akhbar melaporkan Masjid Kariah Paroi Jaya di Seremban menyediakan kemudahan WiFi bertujuan membantu pelajar golongan B40. Berita turut melaporkan Masjid Jamek Kampung Kuala Slim, Perak, menyediakan kemudahan internet percuma kepada anak-anak ahli kariah, membolehkan anak-anak mengikuti Pengajaran dan Pembelajaran di Rumah. Di samping itu, Bahagian Pengurusan Masjid Jabatan Agama Islam Perak turut melaporkan, terdapat 58 buah masjid seluruh negeri Perak telah menyediakan kemudahan internet percuma kepada anak-anak ahli kariah.



Usaha yang dirintis oleh jawatankuasa masjid-masjid ini, merupakan contoh kepekaan jawatankuasa masjid yang tampil ke hadapan, menawarkan khidmat bantuan, membantu untuk menjayakan program pendidikan kepada anak-anak yang sangat memerlukan. Langkah tersebut merupakan langkah terpuji dan wajib dicontohi.

Sebelum mengakhiri khutbah pada hari ini, marilah kita sama-sama renungkan peranan masjid yang diamalkan oleh Rasulullah SAW dan para sahabat baginda. Masjid sentiasa menjadi tumpuan utama bagi setiap urusan umat Islam. Masjid Nabawi di zaman Rasulullah contohnya, telah menyediakan kemudahan pengajian percuma merangkumi tempat tinggal dan makanan kepada para fuqara yang tinggal di masjid. Inilah pendekatan yang wajar kita contohi, bagi meringankan beban dan derita umat pada waktu yang penuh mencabar ini.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

Khutbah Kedua

الْحَمْدُ لِلَّهِ⁵ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ⁶ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁷ وَكُونُوا مَعَ الصَّادِقِينَ.

Sidang Jumaat yang dirahmati Allah,

Sebenarnya, peranan masjid dalam pendidikan adalah sangat luas iaitu merangkumi pendidikan keimanan, akhlak, kejiwaan, akal dan kemasyarakatan. Mimbar menyeru agar daya usaha jawatankuasa masjid yang disebutkan tadi, dijadikan inspirasi oleh lebih ramai jawatankuasa dan pegawai masjid serta surau. Mimbar menyeru agar jawatankuasa masjid dan surau di negeri Perak tampil ke hadapan, berperanan aktif, membantu menjayakan program pendidikan secara maya melalui cara:

⁵ Memuji Allah

⁶ Selawat ke atas Nabi Muhammad SAW

⁷ Pesan Taqwa



Pertama: Masjid dan surau disarankan supaya mengenal pasti anak-anak kariah yang memerlukan bantuan peranti dan capaian internet untuk tujuan PdPR.

Kedua: Masjid dan surau disarankan menyediakan kemudahan internet percuma dan ruang yang sesuai dan selesa bagi pelajar mengikuti sesi PdPR.

Ketiga: Masjid dan surau menyediakan tabung khas kepada orang ramai untuk membuat sumbangan bagi menjayakan program PdPR.

Keempat: Orang ramai, ahli korporat yang dilimpahi nikmat rezeki, tampil ke hadapan memberikan sumbangan dan wakaf, membantu menjayakan program PdPR di masjid dan surau. Hayatilah firman Allah SWT dalam surah At-Taubah ayat 18:

إِنَّمَا يَعْمُرُ مَسَاجِدَ اللَّهِ مَنْ ءَامَنَ بِاللَّهِ وَالْيَوْمِ الْآخِرِ وَأَقَامَ الصَّلَاةَ وَءَاتَى الزَّكَاةَ وَلَمْ يَخْشَ إِلَّا اللَّهَ فَعَسَىٰ أُولَٰئِكَ أَن يَكُونُوا مِنَ الْمُهْتَدِينَ ﴿١٨﴾

Maksudnya: Hanya yang layak memakmurkan (menghidupkan) masjid-masjid Allah itu ialah orang-orang yang beriman kepada Allah dan hari akhirat serta mendirikan sembahyang, menunaikan zakat dan tidak takut melainkan kepada Allah, (dengan adanya sifat-sifat yang tersebut) maka adalah diharapkan mereka menjadi dari golongan yang mendapat petunjuk.

Sidang Jumaat yang dirahmati Allah,

Mimbar menyeru jemaah supaya berpegang teguh kepada Aqidah Islamiah, berteraskan Ahli Sunnah wal Jamaah, yang menjadi warisan Rasulullah SAW, para sahabat dan tabiin, hingga kepada kita hari ini. Jagalah hubungan baik kita dengan Allah SWT dan sesama manusia. Makmurkanlah rumah-rumah Allah dengan istiqamah melakukan ibadah, terutamanya solat fardhu berjemaah. Sabda Nabi SAW yang bermaksud:

“Solat berjemaah melebihi solat secara bersendirian sebanyak 27 darjat.”

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾⁸

⁸ Ayat Al-Quran



اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁹، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ. اللَّهُمَّ ادْفَعْ عَنَّا الْبَلَاءَ، وَالْوَبَاءَ، خُصُوصًا وَيْرُوسَ الْكُورُونَا، وَالْغَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بِلَادِنَا هَذَا خَاصَّةً، وَعَن سَائِرِ بُلْدَانِ عَامَّةً.

Ya Allah, berkatilah hamba-Mu yang melaksanakan tuntutan zakat. Kurniakanlah rezeki yang berlipat ganda kepada para pewakaf. Sucikanlah harta dan jiwa mereka, lindungilah golongan fuqara dan masakin daripada kekufuran dan kefakiran yang berpanjangan.

Ya Allah, kurniakanlah taufiq dan hidayah-Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah al-Maghfur-lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. يَا عِبَادَ اللَّهِ،

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ
يُعْظِمُ لَكُمْ تَذَكُّرُونَ ﴿٥٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوا لَهُ عَلَىٰ نِعْمِهِ يَزِدْكُمْ وَاسْأَلُوهُ مِنْ فَضْلِهِ يُعْطِيكُمْ وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

⁹ Doa untuk Kaum Muslimin